



ꦏꦸꦁꦱꦶꦠꦶꦠꦶꦠꦶꦏꦸꦁ
ꦏꦸꦁꦱꦶꦠꦶꦠꦶꦠꦶꦏꦸꦁ
ꦏꦸꦁꦱꦶꦠꦶꦠꦶꦠꦶꦏꦸꦁ
ꦏꦸꦁꦱꦶꦠꦶꦠꦶꦠꦶꦏꦸꦁ



**AWIG AWIG
DESA PAKRAMAN PANJER
2007**

PAKELING NIYASA LAN SESANTHI

1. Bucu Lima : Mateges Pancasila /Panca Sradha
2. Padi lan Kapas : Mateges Kabiodyan lan Keraharjan
3. Candi Bentar undag tiga : Mateges Budaya Agama Hindu sane ajeg medasar antuk Tri Hita Karana.
4. Bandrangan lan keris luk tiga : Mateges Desa Pakraman Panjer pikukuh rawuh riwekas, Ngawit Ida Ratu Dalem Klungkung Mancerang Bandrangan/llen-ilen upakara yadnya, nunggalang bayu. sabda lan idep, ngarajengang kerahayuan jagat.
5. Warna Gadang lan Kuning : Mateges Jagat Panjer magenah ring wewidangan sane gemah ripah (landuh) saha ngamolihang kejagadhitan

6. Sesanthi sane kasurat

"PRADNYA PARAMARTHA

JAYA" soang-soang mateges: Malarapan pangawiweka, ngerajegang kasukerthan jagat sekala-niskala

PIDAGING
MAKA BANTANG AWIG-AWIG.
DESA PAKRAMAN PANJER

	Lepitan
PIDAGING	ii
MURDHA-CITTA	1
Pratamas Sargah. ARAN LAN WEWIDANGAN DESA	1
Dwityas Sargah. PATITIS LAN PAMIKUKUH	2
Trityas Sargah. SUKERTA TATA PAKRAMAN	3
Palet 1. Indik Krama	3
Palet 2. Indik Prajuru	6
Palet 3. Indik Kulkul	8
Palet 4. Indik Paruman	8
Palet 5. Indik Druwen Desa	9
Palet 6. Sukerta Pamitegep	11
Kaping 1. Karang, Tegal, Carik	11
Kaping 2. Pepayonan	12
Kaping 3. Wewalungan	13
Kaping 4. Wewangunan	14
Kaping 5. Bhaya.....	15
Kaping 6. Penyanggra Banjar	15
Cathurtas Sargah. SUKERTA TATA AGAMA	16
Palet 1. Indik Dewa Yadnya	16
Palet 2. Indik Resi Yadnya	20
Palet 3. Indik Pitra Yanya	20
Palet 4. Indik Manusa Yadnya	26
Palet 5. Indik Bhuta Yadnya	27
Pancamas Sargah. SUKERTA TATA PAWONGAN	29
Palet 6. Indik Pawiwahan	29
Palet 7. Indik Nyapian	31
Palet 8. Indik Sentana	33
Palet 9. Indik Warisan	35
Sasthas Sargah. WICARA LAN PAMIDANDA	37
Palet 10. Indik Wicara	37
Palet 11. Indik Pamindanda	37
Saptamas Sargah. NGUWAH NGUWUHIN AWIG-AWIG	38
Astamas Sargah. SAMAPTA.....	39
PAKELING	42

**AWIG-AWIG
DESA PAKRAMAN PANJER
MURDHA - CITTA
AUM, OM.**

Om nama Siwa ya, Om nama Bhuda ya, Om Sri Pasupatastra, Om Awignamastu
nama swaha, mangkana panamaskaran mami kabeh ring Sanghyang Prama Siwa
sida amanggih dirgayusa tan kataman lara wigna apinakang ulun kabeh Krama
Desa Pakraman Panjer, putusang paseban Krama Desa Pakraman Panjer,
gumawe Awig-awig Desa Pakraman Panjer, wastu kasidan prayojanan mami
kabeh, prasama angidep, muang amangehaken kadi linging awig-awig iki.

**PRATAMAS SARGAH
ARAN LAN WEWIDANGAN DESA**

Pawos 1.

- (1) Desa puniki mawasta Desa Pakraman Panjer.
- (2) Wewengkonnya inggih punika sawewidangan Desa Panjer sane mawates
nyatur desa:
 - ha. Sisi kaler antuk Desa Yangbatu.
 - na. Sisi kangin antuk Desa Renon.
 - ca. Sisi kelod antuk Desa Sidakarya.
 - ra. Sisi kauh antuk Desa Sesetan.
- (3) Wawengkon Desa Pakraman Panjer, patch wawengkon ipun sareng Subak
Panjer.

Pawos 2.

- (1) Desa Pakraman Panjer kawangun antuk 6 (enem) Banjar maka panyiwi Pura
Kahyangan Tiga luwirnya:
 - ha. Banjar Kaja.
 - na. Banjar Sasih.
 - Ca. Banjar Kangin.

- ra. Banjar Bekul.
 - ka. Banjar Antap.
 - da. Banjar Celuk.
- (2) Siwosan ring banjar punika taler wenten banjar panyanggra sane kalinggihin antuk sameton dura desa.
- (3) Banjar panyanggra punika taler polih pasayuban saking desa pakraman puniki. Banjar Penyanggra sane wenten ring wewidangan Desa Pakraman Panjer kweh ipun tigang banjar inggih punika :
- ha. Banjar Tegalsari.
 - na. Banjar Maniksaga.
 - ca. Banjar Kertasari.

DWITYAS SARGAH PATITIS LAN PAMIKUKUH

Pawos 3

Awig-awig Desa Pakraman Panjer puniki kapilang / kasurat tur kadasarin antuk:

- (1) Pancasila.
- (2) Undang-Undang Dasar 1945 pamekas pasal 18.
- (3) Tri Hita Karana.

Pawos 4.

Patitis Desa Pakraman Panjer luwire:

- (1) Ngrajegang Agama Hindu majalaran antuk astiti bhakti ring Ida Sang Hyang Widhi Wasa.
- (2) Ngukuhang, ngerajegang susila tata krama, sane makawit saking sinar kasucian Agama Hindu nganutin ring Desa Kala Patra muah Tri Samaya Kala (atita, nagata, wartamana).
- (3) Ngeraketang pasuka dukaan ikrama banjar ping kalih ikrama desa.

- (4) Tulung tinulung salunglung sabayantaka paras paros sarpanaya.
- (5) Ngamecikang miwah ngupakara sakaluwiring sane dados rerempon desa.

TRITYAS SARGAH
SUKERTA TATA PAKRAMAN

Palet 1

Indik Krama

Pawos 5

- (1) Sinalih tunggil sane ngamanggehang Agama Hindu, yening sampun alaki rabi enem (6) sasih suwennya, patut tedun ngayahang banjar ring genahnyane suang-suang sane kawastanin pangayah.
- (2) Pengayah / krama banjar yan sampun madruwe oka lanang tur sampun marabi okanya patut tedun mabanjar nyaluk ayah wong tuanya.

Pawos 6.

- (1) Krama sane balu roban luh wiadin lanang, mangda tedun mabanjar patus.
- (2) Balu putung, papatusane kakuwub antuk sametonne.
- (3) Jadma ubuh (katinggalan yayah rena) luput ayahan.
- (4) Taler luput ayahan yening:
 - na. ruyud.
 - ca. sakit ila.
 - ra. buduh.
 - ka. buta.
 - da. lumpuh.
 - ta. miwah sakit abot sane siwosan.
- (5) Nanging riwekas yang sampun mawali seger, malih keni ayahan.

Pawos 7.

- (1) Yan wenten jadma saking lian Desa Pakraman Panjer, tur maagama Hindu, magenah ring sawewidangan desa pakraman puniki sane sampun ngarangin,

maduwe genah, wiadin antuke nyewa, yan sampun enem (6) sasih suwennyane magenah ring Desa Pakraman Panjer, tur sampun alaki rabi kadadosang:

- ha. Tedun makrama banjar sane nampek ring genahnya tur nawur jinah batu-batu, kwehnyane, manut ring parareman desa pakraman.
 - na. Paindikan pikolih miwah swadharmanya pateh sakadi krama banjar sane siwosan (ngarep).
- (2) Yan nenten tedun makrama banjar ring ajeng (mabanjar ngarep) kadadosang nyarengin / ngwangun banjar panyanggra antuk paetangan kadi ring sor:
- ha. Ping ajeng nawur jinah pawangun desa pakraman kwehnya manut ring parareman desa pakraman.
 - na. Nawur peson-peson nyabran sasih kwehnya manut ring parareman desa pakraman.
 - ca. Ngamiletin prabeya upakara ring Pura Ulun Setra kwehnya manut ring parareman banjar sane ngrempon setra inucap.
 - ra. Salanturnya krama banjar panyanggra inucap kengin nganggen paderbean desa pakraman.
- (3) Yan prade jadma dura desa nenten tedun makrama banjar ngarep miwah makrama banjar panyanggra patut nedunin katreptian dinas, tur nawur prabeya jagabhaya nyabran sasih kwehnya manut parareman desa pakraman. Warga inucap taler polih pasayuban, nanging tan kapatut nganggen padruwen banjar / desa pakraman, sajawaning pariindik kapancabhayan.

Pawos 8

- (1) Yan wenten jadma tamiu tur numpang magenah ring sakuwuban krama banjar / desa pakraman, mangda krama sane katumpangan punika nyadokang ring kelian banjarnya, sane raris nglanturang ring bendesa pakraman.
- (2) Yan sampun nginutin asapunika patut kasayubin saking desa pakraman.

Pawos 9

- (1) Swadharman lan tetegenan krama nganutin dresta, tur prade cedok sang sangkaning tan kapiambeng keni dosa sane mapiteges panukun ayahan, manut parareman desa / banjar.
- (2) Ritatkala krama banjar madruwe karya, tur wenten sinalih tunggil krama banjar nenten ngayahang, patut kadanda manut parareman banjar.
- (3) Yan prade nenten ngayahang banjar ping tiga maturutan, patut kawarahin olih kelian banjarnya.
- (4) Yan prade wenten krama banjar nenten ngayahang banjar ping pat maturutan, patut kati-kelang saking banjar / desa pakraman.
- (5) Risampun katikelang jantos ping lima kengin kaonek nyabran parum jantos tigang pasangkepan.
- (6) Prade sampun kaonek taler tan wenten usaha ngehehin solah maprawerti kengin kasepekang saking banjar / desa pakraman.

Pawos 10.

- (1) Yening wenten krama sane jaga magingsir mabanjar sajeroning desa pakraman, mangda nguningayang ring kelian banjarnya.
- (2) Yening sampun lasia, ikrama punika mangda kaater olih keliannya ka banjar sane katedunin, majalaran ilikita pastika saha kasaksinin bendesa pakraman.
- (3) Yan tan asapunika, tan wenang katampi. Prade wenten banjar sane purun nampi, banjar punika wenang kasisipang olih desa pakraman, tur patut nawur pamidanda manut parareman krama desa pakraman.
- (4) Nyabran wenten papindahan makrama banjar sakadi ring ajeng mangda kauwarin ring parareman banjar suang- suang.

Pawos 11.

Yan maniwekas krama banjar ngarep utawi banjar panyanggra wusan makrama banjar tan polih pahan sangkaning padruwen banjar / desa pakraman.

Palet 2.

Indik Prajuru

Pawos 12.

- (1) Krama desa pakraman, kagambel antuk prajuru desa pakraman luwire:
 - ha. Kelian desa pakraman sane kabawos bendesa.
 - na. Pangliman bendesa pakraman, lur ipun Pangliman Parhyangan, Pangliman Pawongan, lan pangliman Palemahan
 - ca. Panyarikan.
 - ra. Patengen.
 - ka. Pamijian (Juru arah).
- (2) Prajuru desa pakraman kapilih miwah karayanang antuk para krama desa pakraman.
- (3) Prajuru desa pakraman kapilih miwah kagentosin nyabran 5 (limang) warsa, sajawaning wenten pariindik sane mabuat, tur dados malih kapilih.
- (4) Sane dados kapilih anggen prajuru desa pakraman, wantah krama desa / banjar pakraman sane kawastanin pangayah tur tetep jumenek magenah ring Desa Pakraman Panjer.

Pawos 13.

Swadharman prajuru ring desa luwire:

- (1) Swadharmaning bendesa pakraman minakadinya:
 - ha. Mangda ngrajegang pidaging awig-awig desa pakraman puniki.
 - na. Wenang nibakang sakaluwiring pituduh desa pakraman, manut linging Awig-awig desa pakraman puniki.
 - ca. Wenang nyupeksain sakaluwiring parhyangan desa menawita wenten sane rusak tur patut kabecikang.
 - ra. Mangda satata adung sareng ring sang amawa rat, ring sakaluwiring bebawos miwah karya.

- ka. Wenang satata prayatna ring desa tata cara mangda sampunang jantos wenten krama desa pakraman sane mamurug.
 - da. Sareng ring pamangku nabdab sakaluwiring aci miwah caru sane pacang katur ring Pura Kahyangan Tiga kalih ring Bale Agung.
 - ta. Wenang nyatur upeksa rikala wenten sinalih tunggil krama desa pakraman makarya suka miwah duka. Yan prade padewasanya ika mawurug kadi padewasane sane sampun kamanggehang ring awig-awig puniki, wenang bendesa ngandeg karya punika tur mangda I Bendesa nunasang bawos kertha ring Ida Sang Pandita sane ngicenin padewasa, ping kalih sane pacang muputang karya.
- (2) Pangliman bendesa wenang ngewantu bendesa pakraman nganutin amongan suang-suang, nitenin manut tri hita karana.
 - (3) Panyarikan desa pakraman wenang ngelaksanayang sakaluwiring ilikita, nyuratang kaputusan-kaputusan adat, ping kalih sane siwosan sane nyihnayang kahanan desa pakraman
 - (4) Patengen desa pakraman wenang ngetangang sakaluwiring padruwen desa pakraman maka miwah mangda natasang sakaluwiring padruwen desa pakraman ring sajeroning desa pakraman antuk ilikita pastika.
 - (5) Pamijian(Kasinoman), pinaka juru arah, lan ngewantu sahanan karya sane dados amongan prajuru desa.

Pawos 14.

Ring pabanjaran kawentenang taler prajuru maka panyade bendesa, sane madudonan kadi ring sor:

- (1) Kelian banjar kapilih manut daging parareman krama banjar suang-suang salami 2 (kalih) warsa, sawawaning paetengan siwos tur dados kapilih malih.
- (2) Siwosan ring kelian banjar inucap, wenten taler kelian mona sane kapilih miwah kagen-tosin antuk krama banjar suang-suang nyabran limang (5) warsa, tur dados malih kapilih.
- (3) Juru arah ring banjar kawastanin kasinoman kamanggehang manut ririgan magilir nyabran asasih.

- (4) Swadharman kelian mona miwah kelian banjar luwire:
- ha. Wenang ngrajegang daging awig-awig puniki ring banjarnya suang-suang kadulurin pararem kapupulang dados awig-awig banjar.
 - na. Wenang asadu ring bendesa yan ana sinalih tunggil krama banjar mamurug desa tata cara.
 - ca. Lan siwosan punika.

Palet 3.

Indik Kukul

Pawos 15.

- (1) Cacahan swaran kukul inggih punika kadi ring sor:
- ha. Kalampusan maswara ping tiga nungkak.
 - na. Nusang sawa maswara ping lima lambat.
 - ca. Geni bhaya upami umah puwun maswara atulud bulus.
 - ra. Kamalingan (kabahak) maswara duang tulud lambat.
 - ka. Anak ngamuk maswara duang tulud bulus tur yan sampun maswara tigang tulud, macihna sampun wenten melanin.
- (2) Makarya gotong royong wiadin sane siwosan ring sane mungah kadi ajeng, swaran kukul punika lelabatan (ngalad panjang).

Palet 4

Indik Paruman

Pawos 16.

- (1) Bendesa wenang maumang prajuru desa pakraman, para pangelingsir, prajuru banjar miwah para pamangku sami, jaga matetimbang ritakala wenten karya desa pakraman sane pacang kalaksanain antuk krama desa pakraman sami.
- (2) Panemayan paruman desa pakraman sanistane ngwarsa apisan utawi patgatakala manut wiguna.

Pawos 17.

- (1) Ring sajeroning parareman desa pakraman mangda abusana manut tata cara.
- (2) Peruman desa pakraman prasida lumaksana, yening sampun karawuhin antuk prajuru desa pakraman, kelian-kelian banjar (kelian mona) miwah sane kasudi sajeroning parareman punika.
- (3) Sakaluwiring pamutus bawos mangdane kadasarin antuk gilik saguluk utawi ingkup parareman.

Palet 5.

Indik Druwen Desa

Pawos 18.

- (1) Sane dados rerempon desa pakraman luwirnya:
 - ha. Pura Kahyangan Tiga inggih punika: Pura Desa, Pura Puseh, Pura Dalem, Pura Kahyangan kalih Bale Agung, saha palabanya suang-suang.
 - na. Bale desa pakraman
 - ca. Setra, wenten 4 (petang) palebahan magenah nyatur desa.
 - ra. Margi-margi ring desa.
 - ka. Miwah sane lian-lianan sane kamanggehang dados rerempon desa pakraman.

- (2) Tanah padruwen desa pakraman minakadi:
 - ha. Palaba Pura Krama Desa Pakraman Panjer luwir ipun:
 - ha.1. Tanah sawah malinggih 150 are, kaamong antuk para kelian ring suang-suang banjar, pamuponnya kaanggen ngaci ring Pura Kahyangan Tiga.
 - ha.2. Tanah tegalan malinggah 30 are, dados tegak umah dane Pamangku ring Pura Dalem sareng ring Pamangku Pura Kahyangan Desa.
 - ha.3. Tanah tegalan malinggah 10 are, dados tegak Palinggih Pura Dalem.

- ha.4. Tanah tegalan malinggih 10 are, dados tegak gegaleng Pura Dalem.
- ha.5. Tanah tegalan malinggah 60 are, kadadosang sawah kaamong antuk Pamangku Pura Dalem sareng ring Pamangku Pura Kahyangan Desa antuk nandu utawi ngupetinin manut daging parareman krama desa pakraman.
- ha.6. Tanah tegalan malinggah 4 are, kaamong antuk Pamangku ring Pura Desa, kaanggen prabeya parerainan ring Pura Desa.

- na. Siwosan ring Palaba Pura inucap, wenten taler tanah paderben Desa sane malinggih 30 are, dados tegak Pura Desa, Bale Agung miwah Pura Taman.

(3) Ring suang-suang banjar wenten reremponan, minakadi:

- ha. Bale banjar.
- na. Palinggih Panyarikan.
- ca. Pura Prasanak sane dados rerempon banjar.
- ra. Setra kalih Kahyangan Setra rawuh ring Palinggih Mraja Pati.

Pawos 19.

- (1) Kawenangan krama desa pakraman kadi ring sor:
 - ha. Miara sakaluwiring sane dados rerempon desa pakraman.
 - na. Ngamecikang Pura Kahyangan Tiga yening wenten sane rusak, miwah sane siwos-siwosan.
 - ca. Ngaturang aci ring Pura Kahyangan Tiga manut pagiliran suang-suang banjar.
- (2) Ring Desa Pakraman Panjer, wenten Setra 4 (patpat) magenah nyatur desa:
 - ha. Sane magenah ring sisi kaler, karemponin, antuk krama Banjar Sasih lan Banjar Kertasari
 - na. Sane magenah ring sisi kangin, karemponin antuk krama Banjar Kangin sareng krama Banjar Antap.

- ca. Sane magenah ring sisi kelod karempoin antuk krama Banjar Bekul.
 - ra. Sane magenah ring sisi kauh karempoin antuk krama Banjar Kaja, Banjar Celuk, Banjar Tegalsari lan Banjar Maniksaga.
- (3) Palaba patut kaetangang kadi ring sor:
- ha. Krama desa pakraman wenang ngatur kalih kuasa mamiara utawi ngetangang tanah palaba pura inucap manut kadi parareman krama desa pakraman tur kalaksanain antuk prajuru desa pakraman.
 - na. Krama desa pakraman wiadin sapisira ugi tan kuasa ngadol, ngadeyang miwah sakaluwiring palaksana sane asapunika, sajawaning kawigunayang manut patitis saha kacumponin parareman krama.
 - ca. Pamupon tanah palaba pura inucap patut kaanggen ngamecikang, mamiara kalih ngupakara aci ring Pura amongan krama desa pakraman manut kadi daging parareman desa pakraman.
 - ra. Palaba pura inucap patut karaksa antuk I Patengen Desa Pakraman Panjer.

Palet 6.

Sukerta Pamitegep

Kaping 1.

Karang, Tegal, Carik

Pawos 20.

- (1) Sakaluwiring karang paumahan miwah teba, patut mawates antuk tembok wiadin pagehan.
- (2) Wates sisi kaler miwah kangin patut kakaryanin tur kapiara antuk sang madruwe karang, reh punika mawasta gegaleng.
- (3) Yan antuk sang madruwe karang, karasayang pagehe punika ngelikadin tur yening pada arsa sang madruwe karang dados wates punika nganggon pinget kewanten.
- (4) Watase sane marep kamargine patut katembok mangda kawentenang ipun renes miwah asri.

Pawos 21.

- (1) Sajawaning toyan sabeh, tan kuasa ngembahang toya wit saking badan bawi, jempeng, kamar mandi, pawaregan, miwah sane siwosan sane ngawetuang ambu kawon kapekarangan anak lian miwah kamargine, katlabah wiadin tukad.
- (2) Tan kuasa ngentungang luhu-luhu sakaluwiring ipun kapekarangan anak lian miwah kamargine katlabah wiadin tukad.

Pawos 22.

- (1) Ngentasang sawa kapatutang mangda ring pakarangan wiadin pamedal sane mula wantah anggon pamedal sawa (rurung bangke).
- (2) Ngentasang sawa ring tegal wiadin carik anak lian, kapatut manut pituduh prajuru desa pakraman miwah subak.
- (3) Tanah pakarangan miwah sawah sane kamarginin punika, patut kaprayascita antuk sang madruwe sawa, tur kamargiang ring tanah sane kaentap riyinan, tanah sane kaentap siwosan patut kasiratin antuk tirta prayascita punika.
- (4) Nanging yan ngentasang sawa ring tukad, pangkung wiadin tlabah sang madruwe sawa tan keni pamrayascita.
- (5) Padem ring pakarangan umah, tegal miwah carik anak lian, genahe punika patut kaprayascita antuk sang madruwe sawa.

Kaping 2.

Pepayonan

Pawos 23.

- (1) Saluwiring pamula-mulaan tan dados ngungkulin wiadin jagi mayanin pakarangan tur paumahan siwosan.
- (2) Prajuru desa pakraman wenang ngwarah yan wenten pamula-mulaan sane ngungkulin wiadin jagi mayanin pakarangan tur paumahan siwosan punika.
- (3) Pamula-mulaan sane kapatutang mapunggel wiadin maebah patut kalaksanayang antuk sang madruwe pamula-mulaan manut tempo pawanengan pesadok prajuru desa pakraman.
- (4) Sadurung lintang pawanenganne prade pamula-mulaan punika bah tur

- mayanin, sang madruwe pamula-mulaan luput saking kaiwangan.
- (5) Pamula-mulaan sane bah asapunika kabukti antuk sang keni baya.
 - (6) Yan sang madruwe pamula-mulaan sasampune telas pawanenganne nenten kayun wiadin nenten mresidayang munggel wiadin ngebah, pamula-mulaan punika patut kapunggel utawi kaebah antuk sang marasa jekeh jagi kabayanin.
 - (7) Pamula-mulaan punika kaanggen prabeya ngebah tur yan raris wenten sisanya patut katulakang ring sang madruwe pamula-mulaan punika.

Pawos 24.

- (1) Yening pamula-mulaan bah tan nahen, sane madruwe pamula-mulaan punika luput saking prabeya karusakan.
- (2) Pamula-mulaan punika kabukti antuk sang keni baya.
- (3) Ritakala munggel miwah ngebah taru raris mayanin wewangunan anak lian, sang sane munggel utawi ngebah punika patut negen sakancan prabeyan karusakan sareng ngupakara pamrayascita.

Kaping 3.

Wewalungan

Pawos 25.

- (1) Tan dados nglumbar sakancan sane kabawos wewalungan banteng, bawi, kambing, tur sane siwosan ring pakarangan wiadin umah anak lian, taler ring margine.
- (2) Yan wenten wewalungan kadi inucap ring ajeng, patut sang madruwe wewalungan punika digelis nyerepang pramangkin.
- (3) Wewalungan sane malumbar miwah ngeleb tan ketut buri pramangkin patut kadanda manut parareman desa pakraman.
- (4) Yan wenten wewalungan ngrusak pabianan, pamulaan anak siwosan, utawi tetanaman, sang madruwe wewalungan sajeroning kadanda, patut taler nawur kapocolan pabianan utawi pamula-mulaan sane karusak.
- (5) Agung alit kapocolan punika, kaetang antuk prajuru desa pakraman tur tan dados kapiwalin.

Pawos 26.

- (1) Sapasira ugi polih naban wewalungan, patut digelis masadok ring prajuru desa pakraman.
- (2) Prajuru desa pakraman kapatutang:
 - ha. Nguduhang sang naban / pecalang desa miara walungan inucap sapatutnyane.
 - na. Nyiarang ring sawidangan desa majalaran kelian banjar sapasira madruwe walungan inucap.
 - ca. Nglokika prabeya miara wewalungan salami kataban miwah pamidanda sane ngawinang tan asri tetanduran krama siwos.
- (3) Wewalungan sane kataban punika tan wenten ngangkenin risampun kasiarang kadi ajeng mawaneng jantos pitung rahina, wewalungan punika dados padruwen desa pakraman.

Pawos 27.

Nuba ulam ring tlabah, tlağa sawah miwah ring tukad patut kadanda manut parareman desa pakraman miwah subak.

Kaping 4.

Wewangunan

Pawos 28.

- (1) Nyabran ngwangun patut:
 - ha. Mesadok ring prajuru desa, ping ajeng prade wewangunan ngeninin wates, makamiwah kawigunan wewangunan inucap.
 - na. Ngangge asta bhumi miwah gegulak asta kosala-kosali, sanistane manut ring patitis niskala.
 - ca. Tan nyanyubin kapisaga.
 - ra. Krama tamiu sane mewangun ring sawewidangan Desa Pakraman Panjer patut nawur jinah Pamarisudha pawongan lan Palemahan, suang-suang pekarangan kwehnyane manut parareman Desa Pakraman Panjer.

- (2) Prade wewangunan jantos nyayubin bilih-bilih temboke ring telenging wates, risampun kawara tur kasadokang ring prajuru desa pakraman wenang kadanda manut parareman, saha tembok inucap kagubar utawi sanistane mangda kakaryanang abangan.

Kaping 5.

B h a y a

Pawos 29.

- (1) Yan prade wenten krama kakeniang antuk kadukaan sakaluwimya, wenang krama banjar ngawentenang pitulungan.
- (2) Krama banjar dados nyuwarayang kulkul banjar ritatkala wenten kalaran luwirnya: lina, umah puwun, kamalingan miwah sane siwosan.

Pawos 30.

Patgata kala yan wenten wong dura desa kacunduk padem ring sajeroning Desa Pakraman Panjer, mangda bendesa utawi krama desa pakraman nyadokang ring sang amawa rat / sang ngawiwenang.

Kaping 6.

Penyanggra Banjar

Pawos 31.

Ritatkala wenten krama banjar sane pacang ngawentenang sakaluwiring karya maka luwirnya:

- (1) Madewa yadnya.
- (2) Manusa yadnya.
- (3) Pitra yadnya.
- (4) Tur karya sane siwosan, dados nganggen padruwen krama banjar minakadi bale banjar rawuh ring prabotannyane,

**CATHURTAS SARGAH
SUKERTA TATA AGAMA**

Palet 1.

Indik Dewa Yadnya

Pawos 32.

- (1) Ritatkala patirtan ring Pura Kahyangan Tiga, kalih Tawur Agung Kasanga mangda sami krama desa pakraman rawuh mamedek ngaturang bakti sajawaning wenten alang.
- (2) Sapasira ugi yan ngeranjing ka pura ritatkala patirtan wenang apanganggo manut tata caraning wong ngaturang sembah.

Pawos 33.

- (1) Sajawaning patirtan wiadin prarainan Ida Bhatara wenang kori agung parhyangan punika kainebang.
- (2) Sajawaning patirtan yan jagi ngranjing ka pura matur piuning riyin ring I Pamangku.

Pawos 34.

- (1) Sane kabawos Sekan Parekan inggih punika krama desa pakraman sampun madruwe sanggah gede / jangkep, kapatut mangda dados warga sekan parekan adiri / akuren.
- (2) Sekan Parekan patut nyarengin I Pamangku kalih sadeg nabdab banten ring Pura Kahyangan Tiga.
- (3) Ritatkala pamelisan / makiyis, sekan parekan patut sareng ngampil taler ritatkala ngabejiang.

Pawos 35.

- (1) Krama Banjar mangda ngaturang aci ring Palinggih Panyarikan ring suang-suang banjar ring rahina Tumpek Pangarah (Saniscara Kliwon Wariga).
- (2) Rinuju piodalan ring palinggih suang-suang banjar punika, mangda krama banjar pada ngaturang soda, miwah sane lianan, manut parareman krama banjar.

Pawos 36.

- (1) Prabeya piodalan ring Pura Kahyangan Tiga kamedalang antuk krama desa pakraman, tur upakaranya kalaksanayang olih pagiliran banjar manut parareman desa pakraman.
- (2) Prabeya prarainan ring Pura Desa rawuh ring Pura Dalem kamedalang saking pamupon Palaba Pura sane kakuasayang ring I Pamangku utawi kagentosin antuk ngaturang prabiya prerainan ring I Pemangku nyabran asasih.
- (3) Prabeya prarainan ring Bale Agung rawuh ring Pura Taman kamedalang antuk krama banjar sane polih pagiliran ngaturang aci Kasanga katahnya manut parareman Desa Pakraman Panjer.

Pawos 37.

Tata cara kapemangkuan kadi ring sor:

- (1) Ring Pura Desa, Puseh, Dalem miwah Bale Agung (Kahyangan Tiga) patut kawentenang Pamangku, saha dados kawentenang Panyade (Wakil) Pamangku manut pangaptin parareman desa pakraman.
- (2) Ngadegang Pamangku patut nganutin sulur luwirnya:
 - ha. Ngawilang saking turunan.
 - na. Nunas pamuwus Ida Sang Hyang Widhi Wasa.
 - ca. Saking pilihan krama desa pakraman.
- (3) Sane tan dados adegang Pamangku luwirnya:
 - ha. Ceda angga luwiripun: peceng, perot, sengkok, cungh, belang, jeriji tuna, jeriji lebih, bidug, bancih.
 - na. Sakit ila, buduh, ayan.
 - ca. Tan uning ring sastra.
- (4) Prabeya Upakara ngawitin (Adiksa Widhi) Pamangku ring Pura Kahyangan Tiga kamedalang antuk krama desa pakraman, asapunika taler ripitra yadnyanya riwekas, mejalaran upakara pengabenan pranawa.
- (5) Genah ngupakara Pamangku patut ring Pura sane pacang kaamongang.

Pawos 38.

- (1) Sinalih tunggil pamangku ring Pura Kahyangan Tiga kapiambeng, pangacine dados kamargiang antuk sinalih tunggil pamangku sane tan kapiambeng, wiadin antuk panyadenya.
- (2) Yan prade sami kapiambeng, pangacine kamargiang antuk sinalih tunggil pamangku sane sumalih kautamanya ring Pamangku Kahyangan Tiga, utawi nuwur Ida Sulinggih manut ageng pangacine.

Pawos 39.

- (1) Pemangku mangdane ngreresik ring pura, ngaturang wewangi nyabran Purnama Tilem, Kajeng Kliwon, tur prarainan sane siwosan.
- (2) Suang-suang pamangku mangdane ngupeksain sakaluwiring sane dados druwen pura.
- (3) Yan wenten sane rusak miwah ical mangda I Pamangku asadu ring bendesa pakraman.

Pawos 40.

- (1) Pura Kahyangan sane ngeranjing ring Dalem Desa, amongane rawuh ring Pura Palinggih Mrajapati.
- (2) Upakara piodalan miwah prarainan ring. Pura Kahyangan inucap kaetang antuk I Pamangku sane kakuasayang ring Krama Banjar Kangin sareng Krama Banjar Antap.

Pawos 41.

Pikolih Pamangku Kahyangan Tiga luwire:

- (1) Luput ayah Desa / Banjar rawuh roban oka sadurung marabian.
- (2) Sarin canang.
- (3) Lan siwosan punika.

Pawos 42.

- (1) Amongan Palinggih ring Pura Dalem:
 - ha. Banjar Kaja polih Palinggih Padmasana tur Palinggih Ida Ratu Mayun.
 - na. Banjar Celuk polih Piyasan Ida Ratu Mayun.

- ca. Banjar Sasih polih Palinggih Ida Ratu Gede.
 - ra. Banjar Bekul polih Palinggih Ida Ratu Sri Rambut Sedana.
 - ka. Banjar Antap polih piyasan Ida Ratu Dalem.
 - da. Banjar Kangin polih Palinggih Ida Ratu Dalem (Gedong Agung), Palinggih Ida Ratu Ayu, tur Palinggih Ratu Panglurahan.
- (2) Amongan Palinggih ring Pura Desa:
- ha. Banjar Kaja polih Palinggih Ida Ratu Nganten sareng ring Ida Ratu Puseh.
 - na. Banjar Celuk polih Palinggih Ida Ratu Mayun sareng Ratu Panglurahan.
 - ca. Banjar Sasih polih Palinggih Ida Ratu Ketut Petung.
 - ra. Banjar Bekul polih Palinggih Ida Ratu Pasek.
 - ka. Banjar Antap polih Palinggih Piyasan Ida Ratu Desa.
 - da. Banjar Kangin polih Palinggih Ida Ratu Desa (Gedong Agung) sareng Palinggih Ida Ratu Made Jelawung.
- (3) Maka sami Palinggih ring Bale Agung karempoinin antuk krama desa pakraman rawuh ring Pura Taman.
- (4) Palinggih rawuh ring Bale Panyuklan Pura Kahyangan Dalem karempoinin antuk Krama Banjar Kangin sareng Krama Banjar Antap.
- (5) Tembok panyengker ring Pura Kahyangan Dalem karempoinin karusakannya antuk Krama Banjar Kangin sareng Krama Banjar Antap.

Pawos 43.

- (1) Wewangunan Palinggih ring Pura Kahyangan Tiga, karusakannya karempoinin antuk Krama Desa Pakraman Panjer, prabeyanya saking desa pakraman, krama banjar ngarapin kewannten.
- (2) Bale Pasamauan/Pengaruman, Bale Banten, Bale Gong, Kori Agung, Parantenan tur sane siwosan karempoinin antuk krama desa pakraman sareng sami.

Palet 2.

Indik Resi Yadnya

Pawos 44.

- (1) Sejawaning Pamangku, sang pacang madeg pandita utawi pinandita minakadi balian sonteng, kubayan, dalang, sakaluwiring jagi ngenterang yadnya, patut masadok ring Bendesa kalih Parisada Hindu Dharma.
- (2) Prajuru desa pakraman patut ngawas tur wenang ngalangin prade wenten kacihnan sasar kakecap miwah drestane, tur sareng nyaksinin upakara saha nyiarang ring paruman desa tegap rawuhing wates kawenangan pangenter yadnya.
- (3) Krama desa pakraman patut ngaturang ayah sapamadeg miwah ring panglepas sang sulinggih riwekas katuntun antuk prajuru desa pakraman.
- (4) Sang Sulinggih patut ngriyining ngayunin ring wewidangan Desa Pakraman Panjer, sasampun kadi punika wawu muputang yadnya kajebar tios jagat utawi ka dura desa.

Palet 3.

Indik Pitra Yadnya

Pawos 45.

- (1) Ritatkala sinalih tunggil krama madruwe kalampusan mangda asadu ring kelian banjar suang-suang.
- (2) Kelian Banjar mangdane nyupeksain riyin padewasan pamendeman, risampune wawu nguduhang sapari indik dina ayu kalawan tan ayu (dewasa pendeman). Sinalih tunggil utawi sang asadu mangda nywarayang kulkul.
- (3) Kasinoman mangdane ngarahang indik kalampusan punika ring para krama banjar.
- (4) Krama banjar sane lanang sajeroning bebanjaran mangda rawuh makarya pamereman utawi asagan.
- (5) Krama banjar sane istri sajeroning bebanjaran mangda rawuh majenukan makta beras sanistane 1 kilogram maduluran jinah sesari manut ledang daging pakayunane.

- (6) Upakara makarya banten papendeman, malarapan antuk pasewakan, karempoin antuk krama banjar manut agung alit upakara banten punika.
- (7) Kelian banjar utawi kasinoman mangda nyuratang sapangrawuh krama banjar sane majenukan.

Pawos 46.

- (1) Ring indik kalampusan dados mendem sawa ring setra manut ring rerempon bebanjaran nginutin setra pohosan, sawawaning paetangan siwos saking prajuru desa Pakraman.
- (2) Nusang / ngringkes sawa, kalih mendem sawa ngawit saking jam 4 (patpat) sore, utawi maelonin nganut paetangan prajuru desa pakraman / banjar.
- (3) Ritatkala mendem sawa krama banjar mangda ngiringang rawuh ring setra, tur sasampune sawa punika kapendem.
- (4) Yening sawane pacang kageseng, ngantos sawane kaancungan api.
- (5) Ring pacang ngeseng sawa / ngaben ring sajeroning Desa Pakraman Panjer, patut nunas tirta tur pakeling ring Pura Kahyangan Tiga sajeroning desa pakraman.

Pawos 47.

- (1) Yan wenten krama banjar jaga mudalang sawane rawuh ring pagenahane pecak (dura desa), krama banjarnya kangkat kawakilang olih prajuru lunga sareng, sawawaning wenten bawos pasewakan, menawi genahe nyandingin desa pakraman.
- (2) Yan sawane durung kapendem, kapialang antuk dewasa, wenang krama banjar ngamargiang pagebagan arep ring sang madruwe kalaran sasuwennya 3 (tigang) rahina.
- (3) Yan prade wenten krama sane alang kalampusan siwosan ring pakubonnya wenang krama banjar ngrereh sawa punika bakta budal.

Pawos 48.

- (1) Sajeroning kalampusan, krama banjar madruwe kapatutan karya pingpat kadi ring sor:
ha. Majenukan (krama banjar istri).

- na. Mekarya pamereman / asagan (krama banjar lanang).
 - ca. Nusang / ngringkes sawa (krama banjar lanang istri).
 - ra. Mendem sawa ka setra (krama banjar lanang istri).
- (2) Majenukan, makarya pamereman, nusang (ngringkes sawa) kalih mendem sawa ka setra, krama mangda abusana nganutin tata cara adat.
 - (3) Ritatkala ngupakara sawa, nyongsong sawa ka setra, tan wenang ngadakaken swara gora, tan wenang ngarap sawa.
 - (4) Makekelud patut kamargiang yan sampun wenten 12 (roras) rahina sawane kapendem, maka cihna nglukat sakaluwiring mala saking pangarep purusa.

Pawos 49.

- (1) Krama Banjar Panyanggra (krama dura desa) dados mendem sawa ring setra rerempon bebanjarannya nginutin setra pohosan.
- (2) Nanging sadurunge dasa (10) warsa mangdane sampun kaaben / nyapuh saking setra inucap.

Pawos 50.

- (1) Yan wenten sinalih tunggil krama banjar / desa pakraman kalampusan nemonin kala gotongan / semut sadulur:
 - ha. Tan dados nywarayang kulkul.
 - na. Ritatkala ngringkes, rawuh ring mendem sawa tan maciri antuk swaran kulkul (amandung).
 - ca. Tanpa upakara saji / pakiriman.
- (2) Yan wenten sinalih tunggil krama banjar / desa pakraman, kalampusan nemonin Pumama / Tilem, dados nywarayang kulkul ring wawu lampusne, tur yan jaga mendem sawa, sasampunne wusan I Pamangku ngaturang pasucian ring Pura Kahyangan Tiga, nyantos swaran kulkul pamendeman.
- (3) Yan wenten sinalih tunggil krama banjar / desa pakraman, kalampusan nemonin patirtan ring Pura Kahyangan Tiga:
 - ha. Tan wenang mendem sawa, ngentas sawa, ngeseng sawa.
 - na. Yan kalampusan punika wenteng ring sajeroning bebanjaran sane polih

- giliran ngaturang aci ring Pura Kahyangan Tiga, krama banjar punika tan ka-patut malaksana ngupakara sawa sadurung wusan ngaturang aci ring pura.
- ca. Yening kalampusan punika wenten ring sajeroning bebanjaran sane tan polih pagiliran ngaci ring Pura Kahyangan Tiga, manut kadi ring sor:
- ca.1. Tan dados nywarayang kulkul.
- ca.2. Madasar antuk mapengarah dados ngamargiang pajenukan kalih makarya pameran.
- (4) Yan wenten sinalih tunggil krama banjar / desa pakraman kalampusan nemonin Tawur Agung Kesanga:
- ha. Tan dados mendem sawa ring rahina Tawur Agung Kesanga (petang rahina suwennya malelet).
- na. Yan sampun ngembak geni wawu dados mendem sawa, dados ngeseng sawa, tur dados kaupakara kadi sapatut ipun.
- (5) Yan wenten sinalih tunggil bebanjaran sane mamurug daging awig papendeman puniki, wenang bendesa pakraman nyisipang kelian banjar sane purun ngamargiang mendem sawa ring sajeroning patirtan ring Pura Kahyangan Tiga, gung artha manut kadi parareman desa pakraman.

Pawos 51.

- (1) Rare sane durung tumbuh gigi utawi ketus patut kapendem pramangkin tan kakenain dewasa papendeman.
- (2) Jadma padem nandang sakit ila, sawane patut kapendem ring sema / setra ring genah sane kapatutang / kapituduhang olih kelian banjarnya sareng bendesa pakraman.
- (3) Jadma padem salah pati wiadin ngulah pati dados sawane kabuat budal tur kapreteka.
- (4) Yan wenten sinalih tunggil krama sane mobot tur raris seda, sawa punika tan wenang kapendem sadurung bobotane medal.

Pawos 52.

- (1) Sajawaning ring setra, nenten pisan kapatutang mendem miwah ngeseng sawa.
- (2) Sapasira ugi sane mendem sawa, tan kapatut nginepang bangbang ring setra.
- (3) Saluwiring gagumuk / kuburan ring setra sane kabawos nglikadin olih kelian banjar tur desa pakraman, patut kagubar olih sang madruwe.
- (4) Yening sangaduwe tan tinut, patut kagubar oleh krama banjarnya.

Pawos 53.

- (1) Pamendeman nganut paetangan / dresta kadi ring sor:
 - ha. Yening jaga mendem sawa lintangan ring adiri, sajeroning bebanjaran ring setra asiki tur ring rahina tunggal, mangdane sawane sane tampekan ring setrane kamargiang riyinin (tan nglangkahin sawa).
 - na. Asapunika taler pamargine ring pangutangan ngaben.
 - ra. Krama banjar sajeroning setra tunggal tan kapatut mendem sawa sane kapendem riyinin polih saji pakiriman.
 - ka. Yan sampun wusan nguwehin saji pakiriman punika wawu dados malih memdem sawa (tan wenang makirim bangke).
- (2) Sajeroning bebanjaran miwah tunggal setra, yening wenten krama jaga ngentas sawa, ngeseng sawa (ngaben), miwah mandem sawa, pamendeman sawa patut kamargiang riyinan, tan nginutin genah sawa punika, wawu kamargiang upakara ngaben punika.

Pawos 54.

- (1) Mangdane maka sami krama desa pakraman mrasidayang ngamargiang indik pitra yadnyane / ngaben manut kadi munggah ring sor puniki:
 - ha. Sabilang dasa warsa apisan mangdane krame desa pakraman ngawentenang karya pitra yadya (ngerit) maklompok wiadin majuwug dados asiki ring desa pakraman.
 - na. Nenten malih kapatutang nuduk patus ritatkala wenten krama banjar / desa pakraman sane pacang ngaben.

- (2) Upakarane kamargiang manut kasidan sang madruwe karya ngaben (nista, madya, utama).

Pawos 55.

- (1) Bacakan yusan jadma sane patut / tan patut kaabenang luwirnya:
- ha. Rare sadurung mayusa 3 (tigang) sasih utawi 105 rahina tan patut kaabenang.
 - na. Yan sampun mayusa 3 (tigang) sasih utawi 105 rahina ngantos ketus, patut kaabenang, upakarane kamargiang antuk nglungah.
 - ca. Saking maketus ngantos salantur ipun patut kaabenang / dados kageseng ring geni.
- (2) Saluwiring jadma lampus, sajeroning pitung rahina yan pacang kaabenang, pamargine tan ngetang dewasa, maupakara agung wiadin alit, nanging sang padem tan sareh miwah sakit ila.
- (3) Jadma salah pati, ngulah pati, sakit ila, yan pacang kaabenang patut kawewehin antuk upakara ngulapin kalih panebusan.

Pawos 56.

- (1) Sapasira ugi krama banjar / desa pakraman pacang ngaben, patut masadok ring kelian banjar tur bendesa pakraman.
- (2) Krama banjar / desa pakraman sajeroning desa pakraman, tan kalugra ngamargiang ngaben, yan padewasan ngaben punika wenten karya agung / madudus ring Pura Kahyangan Tiga sajeroning desa pakraman, sawawaning sampun polih panugra saking bendesa pakraman.
- (3) Ring indik pacingkreman, kalih panguing ring krama banjar / desa pakraman saking sang makarya ngaben, nginutin agung alit karya pangabenan punika manut parareman suang-suang krama banjar.

Pawos 57.

- (1) Yan wenten krama lampus (kelayusekaran), genahnya ring selat teba/ carik, pamendeman utawi pengabenannya tan patut ngalintangin setra pinih nampek.

- (2) Pamendeman utawi pengabenan punika patut kelaksanayang ring setra sane pinih nampek, mejalaran pesadok prajuru banjarnya majeng ring prajuru banjar pangempon setra inucap.

Palet 4.

Indik Manusa Yadnya

Pawos 58.

- (1) Manusa yadnya inggih punika upakara-upakara dharmaning manusa ngawit saking patemoning kama petak kalawan kama bang sajeroning garba ngantos kalayu sekar riwekas.
- (2) Upacara kadi ring ajeng madudonan sakadi ring sor:
- ha. Magedong-gedongan duk pangrempini ibiang.
 - na. Duk sang kamareka medal.
 - ca. Kepus udel.
 - ra. Roras rahina.
 - ka. Tutug kambuh (42 rahina).
 - da. Nigang sasihin (105 rahina).
 - ta. Pawetu / otonan / odalan (6 sasih).
 - sa. Mapinton ring Bale Agung, duk mayusa 6 (enam) sasih ring Tawur Agung Kasanga.
 - wa. Ngangkid (masakapan ring segara).
 - la. Tutug kelih (Ngraja: wadone, ngembakin: lanange).
 - ma. Matatah / mapandes.
 - ga. Mawiwaha.
 - ba. Mawinten.
- (3) Upacara-upacara iucap nista, madya, utama, manut sastra agama saha catur dresta ring Desa Pakraman Panjer.

Palet 5.

Indik Bhuta Yadnya

Pawos 59.

- (1) Bhuta yadnya inggih punika upacara-upacara pabyakala ring pertiwi lan Kahyangan, sarwa prani saha upacara-upacara bebhutan.
- (2) Rahina Tawur Agung Kasanga, kajantenang antuk sang amawa rat.

Pawos 60.

- (1) Pakiyisan kamargiang kadi ring sor:
 - ha. Pacanangan / auban ring Tri Kahyangan rawuh ring Pura Prasanak mangda kairing makiyis ka segara.
 - na. Arahina sadurung makiyis, Pratima Tri Kahyangan miwah prasanak ring nyoreang mangda paum ring Bale Agung.
 - ca. Ritatkalá lunga makiyis mangda tegap ngampil kadi ring sor:
 - ca.1. Pacanangan Pura Desa mangda kapundut antuk pangampil Desa.
 - ca.2. Pacanangan Pura Dalem mangda kapundut antuk pangampil Dalem.
 - ca.3. Kasarengin antuk Sekan Parekan.
 - ka. Krama desa pakraman patut sami sareng makiyis.
- (2) Pangembakan kawentenang arahina sasampune makiyis.
- (3) Upacara ring Tileming Kesanga.
 - ha. Krama ring suang-suang banjar mangda ngaturang prani ring banjar.
 - na. Sorene krama desa pakraman mangda ngaturang aci Tawur Kasanga ring Bale Agung genah Ida Bhatara nyejer.
 - ca. Patut kawentenang pacaruan Tawur Kasanga ring suang-suang lebu.
 - ra. Ring Pura Tegal Penangsaran, krama desa pakraman kapatut taler mangda ngaturang idangan pacaruan aci Tawur Kasanga.
 - ka. Bebantenan pacaruan Aci Tawur Kasanga ring suang-suang / lebu krama desa pakraman manut pawarah Desa pakraman.

Pawos 61.

- (1) Benjangne krama desa pakraman mangda ngamargiang panyepian.
- (2) Sajeroning panyepian krama desa pakraman patut ngamargiang brata panyepian luwir ipun:
 - ha. Amati geni.
 - na. Amati karya.
 - ca. Amati lelanguan.
 - ra. Amati lelungaan.
- (3) Ring sajeroning krama desa pakraman ngamargiang brata panyepian saking semeng rawuh semengane benjang, yan wenten krama sane mamurug wenang kadanda kwehnya manut parareman prajuru desa pakraman.
- (4) Sajeroning panyepian yan krama desa ngawentenang karya kadi ring sor puniki, luput saking pinanda luwirnya:
 - ha. Mulan pitung dinain wong rare.
 - na. Nyambutin wong rare.
 - ca. Ngotonin tuwun katanah.
 - ra. Ngodalin ring sanggah / pamrajan / paibon / panti / Pura Kahyangan Tiga.
 - ka. Sakaluwiring upakara inucap ring ajeng mangda kamargiang sakantun rahina.
- (5) Sajeroning panyepian yan krama desa pakraman pacang ngamargiang kadi karya inucap, mangda polih panugraha riyin saking prajuru desa pakraman.
- (6) Pecalang desa (petugas pengamanan) wenang nureksain yan wenten sane mamurug katreptian panyepian punika.
- (7) Sane janten sampun iwang mangda kabawos antuk prajuru desa pakraman, tur kapatut mangda nawur pinar.da.

**PANCAMAS SARGAH
SUKERTA TATA PAWONGAN**

Palet 1.

Indik Pawiwahan

Pawos 62.

- (1) Pawiwahan inggih punika patemoning purusa predana, malarapan panunggalan suka cita kadulurin upasaksi sakala niskala.
- (2) Palaksana pawiwahan luire:
 - ha. Pepadikan / Ngedih.
 - na. Ngrorod / nglayat.
 - ca. Nyeburin utawi sentana nyeburin (risampun nganutin upacara pamerasan).
- (3) Pidabdab sang pacang mawiwaha patut:
 - ha. Sampun manggeh daha-teruna.
 - na. Sangkaning pada rena (tan kapaksa).
 - ca. Kawisudayang prade pangamble tios agama miwah kapatiwangi.
- (4) Pamargin pawiwahane mangda taler nganutin Undang-undang Perkawinan saking sang ngawiwenang.

Pawos 63.

- (1) Pawiwahan sane kapatutang ring Desa Pakraman Panjer sakadi ring sor:
 - ha. Pawiwahan manut upacara Agama Hindu, patut kadulurin antuk ilikita pawiwahan tur kasaksiang niskala antuk pandita utawi balian sonteng miwah sakalane antuk prajuru desa lan dinas.
 - na. Ilikita punika kamadelang antuk kelurahan tur katumusang ring sang amawa rat.
- (2) Parabian sane tan manut kadi ring ajeng sinanggeh tan patut (tan sah).

Pawos 64.

- (1) Yan mapikuren majalaran antuk ngrorod utawi nglayat kapatutang saking lanang:
 - ha. Panglukuan, ngwentenang duta majatiang ring kapatutan sang istri.
 - na. Ngluku kamargiang sagelisnyane sasampune sang istri keni kaambil tur nuju kala wengi, sakirang-kirangnya 24 (pat likur) jam.
 - ca. Ngeluku patut kalaksanayang antuk sakirang-kirangnya 2 (kalih) diri tur makta suluh pinaka ciri.
 - ra. Sajaba wenten kakewuhan panglukuan dados kamargiang majalaran antuk surat (sewala patra) kaater oleh kelian dinas sareng utusan.
- (2) Mapikuren dados taler kalaksanayang antuk mamadik / ngedih kamargiang manut kadi tata cara tur sima dresta sane sampun katah mamargi.
- (3) Siwosan kadi cara ring ajeng, taler dados mapikuren antuk nyeburin utawi sentana risanipun nganutin upakara pamerasan.

Pawos 65.

Pelaksanaan pawiwahan tan patut kamargiang sakadi ring sor.

- (1) Salah jejuangan kalih salah timpal, manut kocap sastra agama luire:
 - ha. Lanang istri papernahan meme utawi rerama.
 - na. Lanang lawan istri (nyama) tunggal meme tunggal bapa.
 - ca. Lanang lawan istri tunggal bapa lian meme.
 - ra. Bapa kalawan pianak.
 - ka. Pianak kalawan meme, miwah patemon sane siwosan tur sumaih sakadi ring ajeng kawastanin gamia gemana. Jadma punika wenang kadanda ngupakara desa sakadi pamarisudha kaletahan.
- (2) Tan kapatutang ngamargiang patemon kalawan buron / sato, ika ngaran salah krama. Jadma punika wenang kadanda mangda ngupakara desa makadi pamarisudha kaletahan.
- (3) Yan wenten sinalih tunggil krama Desa Pakraman Panjer kadapetan / katanggeh ngamargiang patemon kalawan anak istri utawi anak lanang siwosan ring istri utawi suaminyane patut kadanda ngupakara desa.

Pawos 66.

- (1) Anak muani sane nyeburin sentana luh tan dados malih ngrereh rabi yan tan polih kabebasan saking matuane miwah kurenan ipune.
- (2) Yan sampun polih kabebasan punika, pianak sane medal saking kurenan ipun wawu (kaping kalih) patut polih padum saking padruwen I Sentana sajawaning wenten pasubaya.
- (3) Anak muani sane nyeburin santana luh, tur sampun ngwentenang pianak prade padem matua miwah kurenannyane sane kaceburin punika tan dados ngrereh kurenan malih yan tan polih kabebasan saking pianaknyane deha teruna utawi pakulawargan purusa prade pianake kantun alit-alit.
- (4) Yan sampun polih kabebasan punika I Pianak sane saking kurenannya wawu taler patut polih padum waris saking padruwen sentana sajawing wenten pasubaya.
- (5) Anak muani nyeburin sentana luh, prade padem matua miwah kurenannyane sane kaceburin punika, tur tan maduwe pianak, anak muani punika kengin ngrereh kurenan malih.
- (6) Pianak saking kurenannyane sane wawu patut polih padum waris saking padruwen sentana sane kaceburin.

Palet 2.

Indik Nyapian

Pawos 67.

- (1) Yan wenten krama sane pacang palas marabi, patut masadok ring kelian banjarnya sane raris numusang ring bendesa pakraman.
- (2) Kelian banjar sareng ring bendesa pakraman mangda midabdabin tur ngutsahayang mangda prasida adung.
- (3) Yening usaha pangadung punika nenten mrasidayang, kapatut numusang ring sang rumawos (Pengadilan Negeri).
- (4) Yan sampun wenten putusan Pengadilan Negeri indik palas marabi inucap kelian banjarnya patut nyiarang kaluputan ayah nyihnayang krama sane palas marabi punika.

- (5) I Krama sane palas punika patut polih ilikita palas marabian sane kamedalang oleh bendesa pakraman turmaning mipil dados ayah balu.

Pawos 68.

- (1) Maniwekas yan kacihna sang palas malih adung, patut kelian banjar nya ngwarahin.
- (2) Yening wantah sayuwakti jagi atep marabian malih, patut nglaksanayang upakara pawiwahan tur kadanda manut parareman banjar.
- (3) Yan sampun asapunika patut nedunin ayahan banjar malih.

Pawos 69.

- (1) Yang wenten krama banjar / desa pakraman sane sampun balu raris ngungkung anak istri, sandang kaupeksain riyin ring kelian banjar nya tur bendesa pakraman.
- (2) Yan sampun sinah patut katedunang makrama banjar, keni ayahan banjar / desa pakraman tur mangda maupakara antuk pawiwahan.

Pawos 70.

- (1) Bebaluan luh boya sentana, patut ngamangehang pati brata, tegesnya satia aguru laki, tan dados ngamargiang paradara (mamitra).
- (2) Bebaluan sane mamitra dados kaglemekin antuk i pianak, utawi yan i pianak kari alit wiadin yan tan madruwe pianak dados kamulihang antuk pakadangan muaninnyane sane pinih tampek, manut tata cara.
- (3) Bebaluan sane kamulihang wiadin sane saking manahnyane ninggalin umah muaninyane pecak, dados nguasayang atenga saking pupulan guna kayan ipun sareng muaninne pecak.
- (4) Asapunika taler bebaluan muani sane nyeburin sentana luh.
- (5) Bebaluan luh, sane wit waris guna kaya kakuasayang antuk ibaluan punika nanging tan dados ngadol / ngadeyang / makidihang tur siwos-siwosan yan tan polih kabebasan saking pianak wiadin pakadangan sane pinih tampek saking pakurenan ipune.

Pawos 71.

- (1) Yan prade wenten anak istri jeg mobot sadurunge masakapan, mangdane katatasan riyin sapari indik sang kalaran.
- (2) Panetes punika mangda kamargiang olih wong tuanya, kelian banjarnya tur bendesa pakraman, samalihnya mangda kamargiang antuk trepti tur sipeng, mangdane tan jantos wera.
- (3) Yan sampun kacihna sane malaksana mangda nglaksnayang separi indikan upakara pawiwahan / mesakapan.
- (4) Yan tan mangkana, ika ngaran ngletehin jagat, wenang kawaliang pipilnyane, saking banjar / desa pakraman.
- (5) Yan prade sane lanang mamurug tan satinut masakapan, wenang wong tuanya meras rare embasan inucap pinaka cucunya.
- (6) Yan wong punika sampun madruwe rabi tur tan prasida nyakapang patut mariangkenin embasan rare inucap antuk usaha pamerasan.
- (7) Yen sane istri tan arep, wong tuane patut meras rare pinake cucunyanne.
- (8) Yan jadma saking siwosan desa malaksana asapunika, kadesek riyin mangda kayun masakapan, yen taler ipun mamurug tan arep, raris kalaporang ring sang amawa rat sane pacang mawosang.

Palet 3.

Indik Sentana

Pawos 72.

- (1) Sentana wenten kalih pawos, sane kaucap prati sentana, miwah sentana paperasan.
- (2) Prati sentana inggih punika sane metu saking pawiwahanne kapatut.
- (3) Prade pawiwahanne tan ngawetuang sentana, kengin ngidih sentana antuk upasaksi sekala niskala sane kawastanin sentana paperasan.

Pawos 73.

- (1) Yan wenten sinalih tunggil krama banjar / desa pakraman katiban buncing ngaranika tegesnya yening manak roro wetunya sadina yan kang istri

dumunan kang lanang ukuran tur ya suang-suang ngawa ari-ari.

- (2) Yan wenten asapunika, yan sampun rarene mayusa 42 utawi abulan pitung rahina, mangda katunasang tirta ring pura Kahyangan Tiga, anggen ngetisin sang rare, maka cihna anggen panyupatan mala.
- (3) Yan krama / jadma sane maduwe rare buncing punika nenten mrasidayang ngupakara kadi ring ajeng, wenang krama desa pakraman nguwehang patulungan.

Pawos 74.

- (1) Tan kapatut antuk awig-awig desa pakraman manut parareman desa pakraman, pamedalan rare tan saking palarapan upakara pawiwahan, anak alit punika kabawos pianak bebinjat.
- (2) Pianak bebinjat tan patut anambah ring Pura Kahyangan Tiga saantukan kabawos leteh sadurung kaupakara.

Pawos 75.

- (1) Sane dados idih anggen sentana, pinih riyin patut ngambil ring turunan sameton lanang, yan tan wenten sane ambil irika, wawu dados ngambil ring turunan mingsiki / misan saking purusa.
- (2) Yan tan wenten ring sapanunggalan katurunan, wawu dados ngrereh sakama-kama (sakita kayun).
- (3) Ring sajeroning ngangkat sentana, pinih riyin mangda polih paigun bebawosan saking pakadangannyane.
- (4) Sane anggen sentana lanang miwah istri dados lintangan ring adiri manut kayun sang ngarsayang.

Pawos 76.

- (1) Ngangkat sentana mangda majalaran antuk upakara pamerasan.
- (2) Upakara punika kasaksinin antuk banjaranya miwah bendesa pakraman.
- (3) Kadulurin antuk ilikita sentana sane kamedalang olih bendesa pakraman, tur kasaksinin antuk pamong praja.
- (4) Salanturnya raris kasiarang ring krama banjarnya oleh kelian banjar.

Palet 4.
Indik Warisan
Pawos 77.

- (1) Warisan inggih punika tetamian arta brana saha ayah-ayahan ngupadi sukerta sakala niskala saking kaluhurannya arep ring turunannya.
- (2) Kang sinanggeh warisan luire:
 - ha. Duwe tengah makadi palaba pamrajan / sanggah, pustaka suci.
 - na. Pamrajan Kemulan.
 - ca. Pagunakayan, tadtadan / jiwa dana, utang piutang.
- (3) Wawu kengin kabawos warisan prada wenten:
 - ha. Sang mapiturun (pawaris).
 - na. Katurunan. (ahli waris).
 - ca. Arta brana miwah tetegenan (ayah-ayahan) maka cihna warisan.
- (4) Sane kabawos ahli waris inggih punika:
 - ha. Prati sentana purusa (pianak muani ulian purusa).
 - na. Sentana paperasan.
 - ca. Prati sentana pradana (sentana rajeg).

Pawos 78.

- (1) Yening sajeroning kulawarga wenten ahli waris langkungan ring adiri patut ngwentenang paigum indik padum waris punika.
- (2) Yening tan prasidha pamutus bawos ring paigum punika, patut I bendesa miwah prajuru desa sane lianan nguwehin tetimbangan.
- (3) Yening kantun taler prasida pamutus. bawos, patut painedikan punika kalanturang ring sang rumawos (Pengadilan Negeri).

Pawos 79.

- (1) Anak istri sane sampun deha kapatutang nganggen padruwen wong tuanya sajeroning kantun deha.
- (2) Anak istri sane mulih deha majalaran antuk belas sane sah taler kapatutang ngangge padruwen wong tuanya, jantos malih marabian prade padruwen

wong tuanya durung kepah ring pasametonne.

- (3) Pianak sane bapanya raris nyeburin sentana luh patut polih padum waris saking palekadan umah reramanya muani punika.
- (4) Yan wenten anak luh makurenan ngajak pianak astra, bebinjat, ipianak astra miwah be-binjat punika patut polih padum waris saking pagunakayan memenipun sadurunge makurenan, sawawaning wenten pasubayan.

Pawos 80.

Sinalih tunggil ahli waris kengin tan polih padum waris yan prade:

- (1) Nilar kawitan lan sesananing agama.
- (2) Alpaka guru rupaka.
- (3) Sentana rajeg kesah ngrorod (mawiwaha) utawi prati sentana nyeburin, suang-suang kabawos ninggal kadaton (ninggal umah).

SASTHAS SARGAH.
WICARA LAN PAMIDANDA

Palet 1.

Indik Wicara

Pawos 81.

- (1) Sang Sulinggih utawi penglingsir desa pakraman wenang ngicenin tetimbangan ring sajeroning I Bendesa ngrajegang daging awig-awig puniki.
- (2) Sane wenang mawosin makadi mutusang wicara ring desa, inggih punika I Bendesa miwah para penglingsir desa pakraman sane sinanggeh Kertha Desa.
- (3) Prade sang mawicara tan wenten cumpu ring pamutus kertha desa, kengin nunasang wicara inucap ring sang rumawos (Pengadilan Negeri).

Pawos 82.

- (1) Sahanan wicara mawiwit kacorahan sakaluwire sinanggeh nungkasin utawi mamurug pidaging awig-awig miwah parareman desa / banjar, I Bendesa digelis mawosin tan nyantos pasadok.
- (2) Sajaba wicara kadi ajeng patut nyantosang pasadok sang nunas bawos.
- (3) Panepase patut pastika nyantenang iwang patut malarapan Tri Pramana (saksi, ilikita, bukti) miwah tan maren nepek ring catur dresta.

Palet 2.

Indik Pamindanda

Pawos 83.

- (1) Bendesa wenang nibakang sisip pamidanda ring krama desa pakraman sane mamurug linging awig-awig desa pakraman punika.
- (2) Bacakan pamidanda luire.
 - ha. Danda arta saha panikel-panikelnya.
 - na. Kapakelingan / ngwarahin.
 - ca. Pangaskara.
 - ra. Ngupaksama.

- ka. Kasepekang.
- da. Kanorayang utawi kawaliang pipilnyane.

Pawos 84.

- (1) Yan wenten krama banjar / desa pakraman luihya mabawos tan rahayu arep ring krama banjar / desa pakraman; mamisuh krama banjar / desa pakraman tur sakaluwiring sisip ring banjar wenang kapakelingang saking krama banjar.
- (2) Sajeroning 6 (enam) sasih jadma punika durung ngangken ring sikian iwang jadma punika katumusang ring prajuru desa pakraman mangda kabawos buat kaiwangannyane.
- (3) Prade prajuru desa pakraman tan mrasidayang mawosang saantukan jadma punika kukuh ring raga, raris kasepekang saking desa pakraman.
- (4) Krama sane sampun kasepekang saking krama banjar / desa pakraman tan polih pasayuban banjar miwah desa pakraman.
- (5) Yan sasampunne kabawos ring desa pakraman, raris ngangken sikian iwang prajuru desa pakraman mangda ngater mawali ka banjarnya tur nyukserahang ring kelian banjar.
- (6) Madasar antuk kaiwangan, mangdane krama inucap nawurin kaiwangannya ring banjar banjar sane marupa danda arta.
- (7) Pungkuran kalugra mawali makrama desa yan sampun nganken raga iwang ring banjar madularan mangda nawurin kaiwanganne punika ring desa pakraman.

SAPTAMAS SARGAH.

NGUWAH NGUWUHIN AWIG-AWIG

Pawos 85.

- (1) Nguwah nguwihin awig-awig desa pakraman puniki kalaksanayang antuk parareman desa pakraman.
- (2) Parareman punika mangda kadasarin antuk pakarsan krama desa pakraman sami.

- (3) Pamutus bawos mangda kadasarin antuk gilik saguluk.

Pawos 86.

Parareman indik nguwah nguwuhin awig-awig kadi ring ajeng, dados kamedalang olih bendesa pakraman, prajuru desa pakraman lianan, rawuh ring kelian-kelian banjar yadiastun pareragan miwah sinarengan.

ASTAMAS SARGAH

SAMAPTA

Pawos 87.

- (1) Awig-awig puniki kawastanin Awig-Awig Desa Pakraman Panjer.
(2) Awig-awig puniki mamargi ngawit kararemin.

Pawos 88.

- (1) Sakaluwiring sane sampun wenten sadurungnya patut kaanutang ring daging awig-awig puniki.
(2) Sakaluwiring sane durung kabawos sajeroning awig-awig puniki tetep kalaksanayang manut tata cara sane sampun katah mamargi saha kadulurin antuk pararem-pararem.
(3) Sajeroning ngamargiang awig-awig puniki prajuru mangda:
ha. Ngwentenang galah pangala desa mangda prasida desane nincepang pangweruh lan pangupajiwa.
na. Mawirasa ring para yogia sane taler ngawiwenang krama luire; lurah utawi kepala lingkungan miwah pakaseh.
(4) Para penganut agama miwah kepercayaan sane siwosan ring Agama Hindu tur magenah ring sawewengkon Desa Pakraman Panjer:
ha. Nenten kakeniyang ring daging awig-awig puniki, nanging kaetang antuk kelurahan.
na. Bendesa pakraman patut karengayang taler pituduhnyane, sajeroning palaksana punika.
ca. Polih pitulung ring sajeroning bhaya.

Pawos 89.

- (1) Awig-awig puniki kararemin duk rahina Buda, Pon, Wuku Pujut, icaka warsa 1929, tanggal 25 Juli 2007, magenah ring Bale Bendesa Pakraman Panjer.
- (2) Awig-Awig punika kalingga tanganin antuk Prajuru Desa Pakraman Panjer, kasarengin kelian-kelian banjar, saha kasaksinin antuk Lurah Panjer lan Camat Denpasar Selatan, saha kapikukuh antuk murdhaning Jagat Denpasar.
- (3) Luir panglingga tangan:

ha. Kapertama prajuru pakraman
ha.1. Bendesa Pakraman Panjer Panyarikan Desa Pakraman Panjer.



Dr. I Nyoman Budiāna, SH, MS Wayan Ariawan, SP

ha.5. Kelian Mōna Banjar Kaja

Made Suryanata, SH

ha.6. Kelian Mōna Banjar Kangin.

Wayan Budiāsa

ha.7. Kelian Mōna Banjar Antap

Nyoman Madra

ha.8. Kelian Mōna Banjar Celuk.

Suanda

ha.9. Kelian Mōna Banjar Sasih

Wayan Regip, A.Ma.Pd

ha.8. Kelian Mōna Banjar Bekul.

Made Gede Suparta

ha.9: Kepala Desa Banjar Tegalsari, ha.10: Kepala Desa Banjar Maniksaga.



Ma Winaya



I Gusti Oka Adnyana



Kelian Banjar Tegalsari

Drs. I Made Piara

na. Kepala kelih prajuru dinas:



Drs. I Made Rapog
Nip. 130778431



na.2. Camat Denpasar Selatan.

I Ida Bagus Aji Wiradana, S.Sos, M.Si
NIP.010190633



Maka Mardha Pamikukuh
Wakil Walikota Denpasar

I Ida Puspayoga

PAKELING

Dudonan Pangripta Awig-awig Desa Pakraman Panjer

(1). Luir Pamidabdab

ha. Kapertama saking Majelis Pembina Lembaga Adat Propinsi Dati I Bali

ttd

I Wayan Koti Çantika, SH.

na. Kaping kalih saking Fakultas Hukum Universitas Udayana

ttd

ttd

I Wayan Koti Çantika, SH.

I Nengah Sudantra, SH.

Ttd

I Dewa Rai Asmara Putra, SH.

(2). Juru Pangrencana Awig-awig :

- | | | | |
|-----|-------------------|---|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| ha. | Penasehat | : | ha.1. Lurah Panjer.
ha.2. Bendesa Pakraman Panjer.
ha.3. I Made Nuadi.
ha.4. I Gusti Ketut Reding.
ha.5. I Made Weja. |
| na. | Manggala
Wakil | : | I Nyoman Budiana, SH.
I Made Riawan, SH. |
| ca. | Penyarikan | : | I Nyoman Semara. |
| ra. | Angga | : | ra.1. Drs. I Made Sudiara.
ra.2. I Made Darta.
ra.3. Gusti Ngr. Ketut Redung.
ra.4. I Ketut Gde Sukariyasa, SE.
ra.5. Anak Agung Ngurah Oka.
ra.6. I Ketut Wirata.
ra.7. I Wayan Regep Nurjaya.
ra.8. Drs. Ida Bagus Rama.
ra.9. I Gusti Made Gurindem.
ra.10. Kelian Dinas se-Kelurahan
Panjer.
ra.11. Kelian Banjar se- Desa
Pakraman Panjer. |

3. Juru Uwah-wuhin Awig-awig :

- | | | | |
|-----|------------|---|---------------------------------------------------------|
| ha | Penasehat | : | ha.1. Lurah Panjer. |
| | | | ha.2. Bendesa Pakraman Panjer. |
| | | | ha.3. I Made Nuadi. |
| | | | ha.4. I Made Weja. |
| ha. | Manggala | : | Dr. I Nyoman Budiana, SH.MSi |
| | Wakil | : | I Wayan Rastina, SE. |
| ca. | Penyarikan | : | I Wayan Ariawan, SP |
| ra. | Angga | : | ra.1. Drs. I Nym. Darsana, M.Hum. |
| | | | ra.2. I Wayan Redog |
| | | | ra.3. I Ketut Sukanata, SH |
| | | | ra.4. I Ketut Gde Sukariyasa, SE. |
| | | | ra.5. Anak Agung Ngurah Oka. |
| | | | ra.6. I Ketut Wirata. |
| | | | ra.7. I Wayan Suarna, SE, MSi |
| | | | ra.8. I Ketut Wijaya, SE |
| | | | ra.9. Drs. I Made Sudarsana |
| | | | ra.10. Drs. Nyoman Suarsa |
| | | | ra.11. I Made Suda |
| | | | ra.12. I Wayan Nendra |
| | | | ra.13. I Wayan Narta |
| | | | ra.14. I Ketut Sucitra |
| | | | ra.15. I Wayan Suana |
| | | | ra.16. I Ketut Darma |
| | | | ra.17. I Wayan Budiassa, SE M.M |
| | | | ra.18. I Made Mandra |
| | | | ra.19. Ir. Gusti Made Murdika |
| | | | ra.20. Ir. I Wayan Diartika, MT |
| | | | ra.21. A.A. Gede Oka |
| | | | ra.22. I Wayan Sudana |
| | | | ra.23. I Nyoman Darsa |
| | | | ra.24. I Made Suparta |
| | | | ra.25. I Nyoman Redon |
| | | | ra.26. Kelian Dinas se-Kelurahan Panjer. |
| | | | ra.27. Kelian Mona/ Banjar se- Desa
Pakraman Panjer. |